

于浩◎編


明清史料叢書

續編

國家圖書館出版社

明
清
史
料
叢
書

明清史料叢書



于浩◎編

明清史料叢書

續編

10

國家圖書館出版

第十冊目錄

勝朝遺事初編

六卷

(清)吳彌光輯

(清)宋澤元重訂

..... 一

卷二

北征錄

(明)金幼孜撰

..... 一

北征後錄

(明)金幼孜撰

..... 四七

北征記

(明)楊榮撰

..... 五九

卷三

宣爐注

(明)冒襄撰

..... 八一

否泰錄

(明)劉定之撰

..... 九一

北狩事蹟

(明)楊銘撰

..... 一一九

北使錄

(明)李實撰

..... 一三九

天順日錄 (明)李賢撰……………一七七

聖駕臨雍錄 (明)周洪謨撰……………二七一

武宗外紀 (清)毛奇齡撰……………三〇七

卷四

大禮議辨 (清)毛奇齡撰……………三六一

諭對錄 (明)張孚敬撰……………四七五

北征錄

李汝敏

永樂八年二月初十日上親征北虜是日駕出德勝門幼孜與光大胡公由安定門出兵甲車馬旌旗之盛耀于川陸風清日和埃塵不興鐃鼓之聲訇震山谷晚次清河十一日早發清河途間雪融泥深馬行甚滑晚次沙河勉仁始至十二日早寒發沙河午次龍虎臺十三日早發龍虎臺度居庸關關下人馬輳集僅容駕過如是者凡數處晚次永安甸大風未幾陰晦須臾大雪少頃雪霽天宇

澄淨雲霞五綵爛然照耀山谷西南諸山無雲巖
壑積雪如銀臺玉闕東北諸山雲掩其半露出峯
頂四顧皆奇觀上立帳殿前面東北諸山命某等
西立觀山上曰雪後看山此景最佳雖有善畫者
莫能圖其髣髴也十四日早發永安甸大風甚寒
且行且獵幼孜觀騎逐兔不覺上馬過前上笑呼
幼孜三人曰到此看山又是一種奇特也蓋諸山
雪霽千巖萬壑聳列霄漢瓊瑤璀璨光輝奪目真
奇觀也午後次懷來十五日早發懷來午次鎮安

驛十六日早發鎮安驛行數里道邊有土垣宛如
一小城問人曰此元時官酒務每歲駕幸上都於
此取酒午次雞鳴山相傳以爲唐太宗征高麗至
此登山雞鳴由是得名上指示幼孜三人曰此卽
雞鳴山昔順帝北遁其山忽崩有聲如雷其崩處
汝等明日過時見之十七日發雞鳴山山甚峭上
有斤堠下有故永甯寺基有歐陽元所譔碑尙存
其西北崩處土石猶新其下卽渾河流出盧溝橋
有石柱數十比列於河側其半出地上俗傳以爲

魯般造橋未成而廢但無紀載可考竊以爲遼金時所造者行里餘路甚窄僅可容兩馬人馬輳集危迫殊甚又行三四里度橋山下有土垣乃元時花園有舊柳數株尙存更行二十餘里過幽兒山路險如雞鳴山石巉然下壓下臨河水路陡絕旁有積雪凝附于岸雪上亦可行但坼裂可畏車行馬驟毛髮栗然過此山漸平上勒馬登高岡召幼孜等指諸山曰此天之所以限南北也且行且語上下馬少坐于山岡之上賜酒殺牛次泥河十八

日發泥河午次宣府上閱武營內夜雨十九日微
雨駐蹕宣府關武營內二十日駐蹕宣府二十一
日發宣府晚至宣平召幼孜等謂曰今減此殘虜
惟守開平興和甯夏甘肅大甯遼東則邊境可永
無事矣二十四日早發宣平行數里度一河水迅
疾及馬腹近岸冰未解水從下流人馬從水上度
間有缺處下見水流而薄處僅盈寸度此甚戰栗
更行數里人山峽中行又數里上登山而行過山
下平陸次萬全大風寒下微雪二十五日大風寒

發萬全行數里至城下上謂幼孜三人曰此城朕
所築過城北見城西諸山積雪上曰此亦西山晴
雪也過城北入德勝口上指關口曰如此險人馬
安能度山皆碎石若堆粟然入關兩峽石壁崎嶇
如削時車馬輳集拆關垣以度過關由山峽中行
地凍冰滑馬蹄時踣間度澗積雪未消從水梁上
行大風甚寒下馬便旋靴底霑雪凝凍滑甚上馬
尤難兩手攀鞍皆凍不能屈伸行二十餘里上野
狐嶺上指東南諸峯曰至此看山則盡在下矣時

風沙眯目小石擊面面爲風所吹皆紫黑下山頂
度關關門爲車所塞從土隄而下地滑馬多仆者
午後至興和城北下營旣而上召獨光大徃上曰
足寒時不要卽附火只頻行足自暖又曰金幼孜
何在恐凍傷其足光大曰適同至僕者未到在彼
控馬二十六日駐蹕興和上祭所過名山大川上
駐馬於營前召幼孜等謂曰汝觀地勢遠見似高
阜至卽又平也此卽陰山春故寒過此又暖爾等
昨日過關始見山險若因山爲塹因壑爲池守此

誰能輕度幼孜等頓首曰誠如聖諭二十七日駐蹕興和上閱武營外時天晴大風上曰爾等今日始知朔方風氣忽天陰上曰雪且至命亟回至營門雪下已而大風復晴二十八日風寒駐蹕興和上閱武營外二十九日獵者得黃羊至上召幼孜等三人觀之遂立語於帳殿前至二鼓乃退三月一日晚上召至帳殿語至二鼓上曰夜已深汝等且休息庶明日有精神歸帳房已三鼓矣自是每宵或漏下或二更始出初二日駐蹕興和賜食黃

羊初七日早發興和行數里過封王陀今名鳳凰山山西南有故城名沙城西北有海子鴛鴦鴻雁之類滿其中遠望如人立者坐者行者聲欬者白者如雪黑者如墨或馳騎逐之卽飛起人去旋下翩躚迴翔於水次過此海子又度數山岡午次鳴鑾戍上指示山謂幼孜三人曰此大伯顏山其西北有小伯顏山指其東北曰由此去開平復曰汝等觀此方知塞外風景讀書者但紙上見未若爾等今日親見之上又曰適所過沙城卽元之中都

此處最宜牧馬語久始退少頃上復謂曰汝等觀此四望空闊又與每日所見者異汝若倦時少睡半餉卽起四面觀望以暢悅胸次幼孜等叩頭退初八日駐蹕鳴鑾戍夜上坐帳殿前望北斗召幼孜等觀北辰正值頭上語至二鼓乃出初九日駐蹕鳴鑾戍上大閱武警師六軍列陣東西綿亘數十里師徒甚盛旗幟鮮明戈戟森列鐵騎騰蹕鉦鼓震動上曰此陣孰敢嬰鋒爾等未經大陣見此似覺甚多見慣者自是未覺先是東風及鼓作徐

轉南風上悅大飲將士午回營夜召幼孜三人至
帳殿前語至二鼓始出初十日早發鳴鑾戍上登
山麓漸行經山谷山平曠不甚高見鹿蛻角于地
長數尺許槎牙如樹枝行數里平山漸盡東北有
山頗高如諸山上曰此卽大伯顏山西北有山甚
長隱隱如雲霧間如海波層疊上曰此卽小白顏
山望之若高少焉至其下則又卑矣由是地平曠
沙中多穴上指示曰此鼯鼠穴也馬行其上爲所
陷漸近一山下見諸軍於此掘井所出沙有純黃

者其色如金白者其色如玉雪又有青黑者上令
中使下馬取觀復以示幼孜三人觀之適中官射
一野馬來進上召幼孜與光大勉仁及尙書方賓
前觀上曰野馬如馬此野驃非野馬汝輩詳觀之
比來每物見之足廣開見又行數里遠望如水近
則如積雪乃是鹺地又行十餘里過凌霄峰卽小
伯顏山也上登山頂多石山下荒草無際北望數
十里外又有平山甚長上曰人未經此者每言塞
北事但想像耳安能得其真也觀望良久乃下見